



*S pressa na Sudu: Doprinos ažurnosti*

*(Foto: B. Nizić)*

# Formirano odjeljenje za komunalne sporove

Općinski sud u Sarajevu prije tri mjeseca je uspostavio elektronski sistem vođenja predmeta. Prema riječima Gorana Salihovića, predsjednika Suda, građani čim predaju predmet u pisarnicu, odmah dobiju broj spisa, datum kada će biti obavljena rasprava te ime i prezime sudije koji je nadležan za slučaj. Na taj način izbjegnuto je stvaranje redova.

Sistem je uspostavljen u Zemljišnoknjižnom (grunt), Privrednom, Parničnom i krivičnom odjeljenju.

Salihović je na jučerašnjoj konferenciji za novinare naglasio da u okviru Suda od 15. maja djeluju i dva nova odjeljenja - Izvršno odjeljenje po vjerodostojnim ispravama i Odjeljenje za sporove male vrijednosti, formirano radi rješavanja komunalnih predmeta.

- Očekujemo da će se izmještanjem rješavanja u novoformirana odjeljenja doprinijeti ažurnosti Parničnog, Privrednog i Izvršnog odjeljenja koji su već duži niz godina zatrpani komunalnim predmetima - kazao je Salihović. *Az. D.*